



Katika Zaburi: Sehemu ya 2

SABATO MCHANA

Somo la Juma Hili: Zaburi 46, Yer. 4:23–26, Ps. 47:1–4, 1 Thes. 4:13–17, Zaburi 75, Ufu. 14:6–12.

Fungu la Kukariri: “Watu na wakushukuru, Ee Mungu, Watu wote na wakushukuru. Mataifa na washangilie, Naam, waimbe kwa furaha, Maana kwa haki utawahukumu watu, Na kuwaongoza mataifa walioko duniani” (Zaburi 67:3, 4).

Tunapofikiria matukio ya mwisho, huwa tuna mwelekeo wa kujikita zaidi kwa wanyama na mamlaka za Ufunuo. Na bila shaka, vina wajibu/nafasi kubwa, muhimu, pia. Vinginevyo, Mungu asingewiweka katika Biblia ili sisi tuvielewe (Tazama Ufu. 1:3).

Unabii, hata hivyo, unashughulika pia na masuala muhimu yanayohusiana na dhambi na taabu, hukumu, vita kati ya wema na uovu, asili ya haki na udhalimu, mateso, na zaidi.

Zaburi pia inashughulika na masuala haya kwa kina sana, ikichunguza karibu kila hisia za wanadamu—kuanzia katika hali ngumu ya kukata tamaa hadi furaha isiyoziilika. Tunaona Israeli wakijiandaa kwa ajili ya vita dhidi ya nguvu za giza. Tunasoma kuhusu watu fulani wanaopambana na swali la kwa nini Mungu hashughulikii uovu mara moja na bila kuchelewa, swali ambalo bila shaka sisi sote tumewahi kujiuliza. Tunaelekezwa katika patakatifu ili kupata majibu, na pia kuna maombi yanayorudiwarudiwa kwa cheo cha Mungu kama Mwumbaji. Je, haya si masuala na maswali ambayo sisi, katika muktadha wetu leo, tunapambana nayo, vilevile?

Bila shaka—ndiyo sababu tutaendelea kuchunguza Zaburi ili kujifunza zaidi kuhusu kweli hizi muhimu.

**Jifunze somo la juma hili kwa maandalizi ya Sabato ya Mei 31.*

Msaada Utakaonekana Tele Wakati wa Mateso

Soma Zaburi 46. Ni ujumbe gani wa tumaini tunaweza kuchukua kutoka katika Zaburi hii katikati ya machafuko ya maisha sasa na kile tunachojua kitakuja juu ya dunia katika siku za mwisho wakati pambano kuu likiendelea hapa?

Zaburi ya 46 inaonekana kugusia mada tunayoipata katika kitabu cha Waebrania: ile ya jambo bora zaidi. Yesu ni bora kuliko Kuhani Mkuu wa duniani, dhahibu Yake ni bora kuliko dhahibu zote za wanyama na patakatifu pa mbinguni ni bora kuliko mifano iliyokuwepo duniani.

Zaburi hii inachukua mtazamo tofauti, hata hivyo. Mtunzi wake hachukui vitu vizuri na kuvitofautisha na vitu bora zaidi; anatofautisha ulimwengu ulio katika uasi—na matokeo ya kutisha ambayo umeleta—na ahadi ya mambo bora zaidi ambayo Mungu anapanga kwa ajili yetu.

Kwa hakika, Zaburi hii imejaa tumaini na ahadi kwamba hata katikati ya ukiwa na majaribu na mateso na vita tunavyokabiliana navyo, hatimaye tunapaswa “kuacha, na kujua ya kuwa Mimi ni Mungu” (*Zab. 46:10*) na kupumzika katika ahadi ya hakika kwamba siku moja haya yote yataisha na kwamba Mungu “atatukuzwa katika mataifa” (*Zab. 46:10*).

Angalia, pia, kile kilichoandikwa hapa. “Kwa hiyo hatutaogopa, ijapobadilika nchi, Ijapopepesuka milima moyoni mwa bahari” (*Zab. 46:2*).

Mtu hawezi kukumbushwa kuhusu matukio yatakayotokea wakati wa Ujio wa Pili wa Yesu: “Mbingu zikaondolewa kama ukurasa ulivyokunjwa, na kila mlima na kisiwa kikahamishwa kutoka mahali pake” (*Ufu. 6:14*). Na hili: “Mkitazamia hata ije siku ile ya Mungu, na kuihimiza; ambayo katika hiyo mbingu zitafumuliwa zikiungua, na viumbe vya asili vitateketea na kuyeyuka” (*2 Pet. 3:12*). Ulimwengu wetu wa sasa, pamoja na maovu yake yote, hautadumu milele na kile kinachokuja baadaye kinatuahidi kitu ambacho akili zetu sasa haziwezi kufahamu. Kwa sasa, ingawa, tunahitaji tu kusubiri, tukistahimili katika imani na kushikilia ufunuo wa Mungu tulionao, hasa katika Yesu msalabani.

Ingawa mambo mabaya yapo katika ulimwengu huu (na tunajua yatakuwa mabaya zaidi), ni tumaini gani unapaswa kupata kutokana na kujua kwako juu ya wema, nguvu na tabia ya Mungu (fikiria: msalaba)?

Tumaini Katikati ya Zahama

Sehemu kubwa ya lugha katika kitabu cha Zaburi ni ya ishara, lakini inapokuja suala la lugha inayoelekeza mbele katika kufanywa upya kabisa kwa sayari yetu, hatuna sababu yoyote ya kuamini kwamba ni ya ishara tu. *Zaburi 46* inatukumbusha kwamba dunia halisi itaathiriwa sana na ujio wa Kristo. Lakini si miamba na bahari pekee vitakavyoathiriwa; kilele kikuu cha historia ya dunia kitamaanisha kuvunjwa kwa falme za ulimwengu—mifumo duni ya serikali ya wanadamu iliyosababisha mateso mengi sana kwa maelfu ya miaka.

Hatimaye mamlaka haya yote, na uovu wote na mateso ambavyo vimeleta juu ya wanadamu, vitafikia mwisho kabisa.

Soma Yeremia 4:23–26. Hili linatuambia nini kuhusu hatima ya ulimwengu huu, angalau hadi “mbingu mpya na dunia mpya” vitakapokuja (Ufu. 21:1)?

Unabii wa Biblia unatuonesha mambo yatakayoupata ulimwengu huu. Maono ya Danieli 7, kwa mfano, inatuonesha bahari yenye dhoruba ambayo kati yake mataifa ya ulimwengu yanatokea. Pepo za migongano na vita huvuma katika bahari ya Wamataifa (*dunia*), zikileta ufalme mmoja wa ulimwengu baada ya mwingine, na hakuna hata moja ya falme inayoweza kutatua matatizo halisi yanayoikumba jamii ya wanadamu. Viongozi wa ulimwengu tunaothubutu kuwaamini karibu kila mara huthibitika kuwa wenye dhambi na wabinafsi kama tulivyo sisi wengine.

Hakuna ufalme wowote aliooneshwa Danieli uliothibitika kuwa makao salama kwa watu wa Mungu (ingawa baadhi ya falme hizo zilikuwa bora kuliko zingine). Lakini tunajua kwamba tuna uraia katika ufalme wa Mungu (*Flp. 3:20*), na juu sana ya machafuko ya sayari hii kuna kiti cha enzi kisichoweza kutikiswa (*tazama Eze. 1:26*). Yesu alifundisha kwamba ulimwengu utaingia katika machafuko makubwa zaidi tunapokaribia wakati wa kurudi kwa Kristo (*Mathayo 24*), lakini tunaweza kushikilia kwa imani, bila kujali hali ya sayari yetu, kwa sababu tunaweza kujua kwamba Mungu anatawala na kwamba atatimiza ahadi Zake: “Mataifa yalighadhibika, falme zikataharuki; Alitoa sauti yake, nchi ikayeyuka. Bwana wa majeshi yu pamoja nasi, Mungu wa Yakobo ni ngome yetu” (*Zab. 46:6, 7*). Kwa muda mfupi, mambo hayaendi sana wala hayataenda. Muda mrefu? Hilo—ashukuriwe Yesu—ni jambo tofauti kabisa.

Hakuna swali, ulimwengu wetu unaonekana kuwa na machafuko na usiotawalika. Kwa mfano, unabii wa Danieli 7 unapaswa kutusaidiaje kuona kwamba hatimaye, mambo yatatuendea vizuri ikiwa tutadumu kuwa waaminifu?

Chini ya Miguu Yake

Soma Zaburi 47:1–4. Inasema nini kuhusu nafasi yetu, hatimaye, katika ufalme wa Kristo?

Muda mrefu, siku zijazo zina tumaini. Hadi wakati huo, wanadamu ulikabidhi utawala wa sayari hii kwa Lusifa na kufikia wakati Shetani alipotokea kwenye baraza la mbinguni katika Ayubu, alijigamba kwamba dunia hii ilikuwa yake. “‘Umetoka wapi wewe?’” Mungu aliuliza. “‘Natoka katika kuzunguka-zunguka duniani, na katika kutembea huku na huku humo,’” alijibu (*Ayubu 1:7*).

Shetani alikuwa anatangaza umiliki; mguu ulitumika katika zama za kale kuwakilisha umiliki. “‘Ondoka, ukatembee katika nchi hii katika mapana yake, na marefu yake,’” Mungu alimwagiza Ibrahimu, “‘maana nitakupa wewe nchi hiyo’” (*Mwa. 13:17*).

Linganisha 1 Wathesalonike 4:13–17 na Zekaria 14:4, na uzingatie miguu ya Kristo. Unapata tofauti gani kati ya vifungu hivi na vinatufundisha nini kuhusu vipengele hivi viwili tofauti, ingawa yanahusiana, vya mamlaka kuu ya Kristo juu ya ulimwengu huu?

Akizungumzia kile ambacho Kristo anafanya mwishoni mwa miaka elfu, Ellen G. White aliandika: “Kristo anashuka juu ya mlima wa Mizeituni, mahali ambapo, baada ya kufufuka Kwake, kutokea hapo alipaa, na mahali ambapo malaika walirudia kutangaza ahadi ya kurudi Kwake. Nabii anasema: ‘Bwana, Mungu wangu, atakuja, na watakatifu wote pamoja naye.’ ‘Na siku hiyo miguu yake itasimama juu ya mlima wa Mizeituni, unaoelekea Yerusalemu upande wa mashariki, nao mlima wa Mizeituni utapasuka katikati yake, ... na litakuwako huko bonde kubwa sana.’ ‘Naye Bwana atakuwa Mfalme juu ya nchi yote; siku hiyo Bwana atakuwa mmoja, na jina lake moja’ (*Zekaria 14:5, 4, 9*). Wakati Yerusalemu Mpya, katika utukufu wake mwingi, unaposhuka chini kutoka mbinguni, unatua mahali ambapo pamesafishwa na kuandaliwa kuupokea, na Kristo, pamoja na watu Wake na malaika, wanauingia Mji Mtakatifu.”—Ellen G. White, *Pambano Kuu*, uk. 545.

Tazama tumaini tulilopewa katika Yesu. Fikiria jinsi ambavyo maisha yangukuwa magumu ikiwa kila kitu kingekoma, milele, kwa kifo. Yote yangukuwa bure, sivyo?

Divai na Damu

Soma Zaburi 75. Soma pia Mathayo 26:26–29 na Ufunuo 14:9–12. Zaburi hii inafunua nini kuhusu baadhi ya masuala yatakayoamuliwa katika hukumu na maandiko haya mengine yanatusaidiaje kuelewa masuala haya?

Kuna wazo fulani kwamba Zaburi hii iliimbwa wakati wa kuangamizwa kimuujiza kwa jeshi la Senakeribu (2 Nya. 32, 2 Fal. 19)—kisa kinachoonekana kuelekeza mbele katika uharibifu wa mwisho wa waovu katika Ufunuo 20. Watu wa Mungu wako ndani ya Mji Mtakatifu pamoja na mfalme wao mwenye haki wakati majeshi ya uovu yanapokuja na kuwazunguka, na kisha wanaangamizwa na Mungu Mwenyewe.

Moja ya mambo ambayo Mungu anayarekebisha katika hukumu ni matumizi mabaya ya mamlaka yaliyotokea katika ulimwengu wetu ulioanguka. Wanadamu walioanguka hawaishi tena kwa ajili ya wengine, au kwa ajili ya utukufu wa Mungu, bali kwa ajili ya nafsi zao. Leo, kwa njia nyingi, tunaishi na matokeo ya kuchagua kuamini kwamba hakuna maana au kanuni ya maadili isiyo na upendeleo katika ulimwengu. Ikiwa kutakuwa na maana, mwanafalsafa Friedrich Nietzsche alisisitiza kwamba ni lazima tuivumbue sisi wenyewe na kujifanya kana kwamba ulimwengu upo kwa ajili manufaa yetu. Kwa kweli, kila mtu anatenda kana kwamba yeye ni mungu.

(Mtu anaweza kuuliza kwa uhalali: *Falsafa hii ilimleteaje ufumbuzi Nietzsche mwenyewe?* Si vizuri sana, kwa kweli. Alipatwa na wazimu, na kuanguka barabarani nchini Italia baada ya kujaribu kumzuia mtu kumpiga farasi. Kisha alitumia miaka 11 iliyofuata ya maisha yake katika hali ya kupooza nusu kabla ya kifo chake mnamo 1900).

Hata kama matatizo ni mabaya sana, kama waumini tunakumbushwa kuishi kwa tumaini na kutoamua siku zijazo kutokana na matukio ya sasa. Ni rahisi kukata tamaa tunapooni mihimili ya ustaarabu ikiendelea kumomonyolewa kwa uthabiti na mioyo na akili za wasiomcha Mungu, au na wale ambao maoni yao juu ya Mungu hayapatikani katika Biblia. Kwa sasa tunaishi katika kipindi ambacho kanuni za kimaadili, hata mambo ya msingi kama vile jinsia ya mwanadamu, mwanamume na mwanamke, yameshambuliwa, angalau katika sehemu fulani za dunia. Aina fulani za ukosefu wa adili, mambo ambayo watu wengi wangeona aibu kuyazungumzia, hata faraghani, sasa yanasifiwa na kushangiliwa hadharani. Hivyo ndivyo mambo yanavyozidi kuwa mabaya.

Ingawa ni lazima tufanye sehemu yetu sasa kujaribu kufanya maisha yawe bora kwa wengine, kwa nini ni muhimu kukumbuka kila wakati kwamba ni lazima ulimwengu huu wa sasa uharibiwe kabisa na kuumbwa kwake upya kimuujiza kabla ya vitu vyote, hatimaye, kufanywa kuwa sawa?

Wokovu Wako Ujulikane

Soma Zaburi 67. Wimbo huu wa sifa unakuweshaje kuelewa wajibu wa watu wa Mungu katika Ufunuo 14:6-12?

Wahandisi katika Taasisi ya Teknolojia Massachusetts (MIT) wamebuni mpako mpya mweusi ambao hufanya vitu vilivyopakwa nao kukaribia kutoonekana kabisa. Umeundwa kwa molekuli yenye umbo la neli za atomu za kaboni, ni mweusi mara nyingi zaidi kuliko kitu chochote cheusi kilichowahi kutengenezwa. Nyenzo hii mpya inaweza kusharabu asilimia 99.995 ya mwanga wote unaoonekana. Hata mwanga angavu zaidi hushindwa kufanya vitu vilivyofunikwa kwa mpako huu kuonekana.

Zaburi 67 inaanza kwa kumsihi Mungu “atuangazie uso wake, njia yake ijulikane duniani” (*Zab. 67:1, 2*). Katika mpango wa wokovu, Mungu ametoa njia kwa ajili ya wenye dhambi kurejeshwa katika kuwepo Kwake kuliko karibu na kwenye utukufu bila kuangamizwa kwa utukufu Wake; na hata sasa, katika maisha haya, msalaba wa Kristo unawezesha uso wa Mungu kuangaza juu yetu.

Lakini kuna zaidi: Mungu anakusudia kwamba tuangaze nuru Yake kwa ulimwengu wote. Hii ndiyo kazi waliyopewa Israeli: hekalu lilipaswa kuwa nyumba ya sala kwa mataifa yote: “‘Nitawaleta hao nao hata mlima wangu mtakatifu, na kuwafurahisha katika nyumba yangu ya sala; makafara yao na dhabihu zao zitakubaliwa juu ya madhabahu zangu; kwa maana nyumba yangu itaitwa nyumba ya sala kwa mataifa yote’” (*Isa. 56:7*).

Katika Zaburi hii, Daudi anatukumbusha kwamba Mungu anataka “njia yake [ijulikane] duniani, wokovu [Wake] katikati ya mataifa yote” (*Zab. 67:2*). Cha kusikitisha, watu wa Mungu mara nyingi wameshindwa katika kazi hii. Taarifa iliyoandikwa juu ya Israeli katika Agano la Kale ina sura zenye giza, kama ilivyo taarifa iliyoandikwa kuhusu kanisa la Kikristo katika kipindi cha miaka elfu mbili iliyopita. Ni kana kwamba tumepaka mioyo yetu kitu cheusi zaidi na kuridhika kusharabu nuru ya Mungu pasipo kuiakisi.

Wakati mwingine, tunachukulia harakati ya Mungu ya siku za mwisho kama aina ya ukumbi wa kuondokea wa tabaka la matajiri uliohifadhiwa kwa ajili ya vipeperushi vya mara kwa mara vya kiroho, na tunaonekana kuridhika kabisa kwamba sehemu iliyosalia ya ulimwengu ikae kwenye ukumbi wa langoni wenye kelele nyingi, bila kujiandaa kwa safari inayokuja. Kanisa la masalio la *Ufunuo 14*, hata hivyo, haliridhiki tu kusimama juu ya Mlima Sayuni pamoja na Kristo, likifurahia kuwepo Kwake. Badala yake, wanaruka juu ya uso wa dunia, wakiuhimiza ulimwengu ujiunge nao juu ya mlima mtakatifu wa Mungu.

Sisi kama kanisa na kama watu binafsi, tunapaswa kuhisi kuwa na wajibu upi kuhusu kuwafundisha wengine kweli tuzipendazo sana?

Tafakari Zaidi: Soma Zaburi 133, Matendo 1:4–9 na Ufunuo 5:4–7.

“Wakati wa wahenga wa imani msukumo wa Roho Mtakatifu mara nyingi ulikuwa unaonekana wazi na kwa nadra sana, si kwa ukamilifu. Sasa, kwa kulitii neno la Mwokozi, wanafunzi waliwasilisha maombi kwa ajili ya karama hii kwa unyenyekevu, na kule mbinguni Kristo alikuwa akiwaombea pia. Alikuwa anadai karama ya Roho huyu, ili aweze kuimwaga karama hiyo kwa watu Wake.”—Ellen G. White, Matendo ya Mitume, Sehemu ya Kwanza, uk. 29.

Wanafunzi waliagizwa kumshuhudia Kristo “‘hata mwisho wa nchi’” (Mdo. 1:8), kazi ambayo ingetangaza kurudi kwa Kristo (Mt. 24:14). Tunapaswa kuendeleza kile walichokianzisha.

Kristo alipotuambia tupeleke injili ulimwenguni, hakutuacha peke yetu ili tujue wenyewe jinsi ambavyo hilo lingetokea. Kazi hii inaongozwa kutokea patakatifu pa mbinguni. Kazi yetu inakamilishwa kabisa ndani ya Kristo: Anatuongoza na kutuwezesha. Hii ni kazi Yake, si yetu: tunatakiwa kufuata uongozi Wake. Utagundua hivi ndivyo ilivyofanya kazi kwa Israeli: Mungu aliwataka kufuata maagizo Yake na kisha akafanya yasiyowezekana yakatokea. Roho tayari anatenda kazi ndani ya mioyo ya majirani zetu; tunatakiwa tuwepo wakati wa kufanya uamuzi unapofika, ili tuweze kuwaalika wajiunge na watu wa Mungu wanaposimama pamoja na Mwana-Kondoo juu ya Mlima Sayuni. Hatupaswi kubuni njia na mbinu mpya, kwa sababu hatujawahi kuisimamia kazi hii.

Maswali ya Kujadili:

① Kuna watu wengi ambao hawajafikiwa, ingawa ujumbe wa malaika watatu umeenea ulimwenguni kote. Darasani, jadili jinsi sisi kama kanisa tunaweza kutimiza vyema kazi ambayo Kristo anatutumia kutimiza. Tunawezaje kujifunza kutokata tamaa wakati ingali kweli kwamba bado watu wengi sana hawajasikia kweli hizi kwa siku za mwisho?

② Katika Ufunuo 5, Yohana anashuhudia kitabu kilichotiwa muhuri akipewa Mwanakondoo kwa sababu anastahili. Wakati mihuri katika kitabu inapofunguliwa katika Ufunuo 6, tunaona historia ya kanisa la Agano Jipya ikitabiriwa waziwazi hadi mwisho wa wakati. Kutokana na maelezo haya, ni masomo gani tunaweza kujifunza kuhusu njia ambayo Mungu anakusudia kuimaliza kazi?

③ Ni matukio gani ya sasa tuyaonayo ulimwenguni yanayoweza kusababisha, kwa urahisi, kile tunachojua kinakuja katika Ufunuo 13 na 14? Vikwazo gani vimesalia?